

**TEZAU LITURGIC**

**7 IUNIE**

**SLUJBA**

**SF. PREOT-MUCENIC**

**PAVEL ANOȘKIN**

\*

**SF. DIACON-MUCENIC**

**GRIGORIE**


**SMIRNOV**

**DE LA MOKINO**



**MINEIUL PE IUNIE**

**MOSCOVA**



# Месяца июня в 7-й день

## Священномучеников

### Павла и Григория Мокинских

#### На велицей вечерни

На Господи, воззвах: стихирь 8, глас 4.

Подобен: Яко добля:

Приидите, хвалу воздадим Господу Богу нашему,/ память новомучеников прославляюще,/ служителей верных,/ исповедников и мучеников Христовых твердых,/ Пермския земли утверждение!/ Тии бо слово Господне соблюдоша,/ вся до конца притерпеша/ и Церкви Русстей похвала и слава явишася./ Ихже мощи святыя лобызающе,/ молитву к ним простираем:/ оградите нас от бед, священномученицы Павле и Григорие, заступлением вашим/ и испросите нам у Господа велию милость.

Плач умиленный Павел сотвори,/ со сверстники юными сый на месте святем,/ идеже стоясте нозе Твои, Господи,/ темже, сострадания и благодарения

исполнися/ и духовне Животворящий Твой Крест  
облобызав,/ светом Воскресения адамант соделася/ и,  
посреде ноци безбожия благодатию возсияв,/  
твердость древних мученик яви/ и смерть от  
безбожных мужественне прият.

Не на земли сокровище себе скрыл еси,/ Григорие  
досточудне,/ но в сердце, к Богу глаголющем/ псалмы  
и пеньми и песньми духовными./ Сия от юности паче  
злата возлюбив,/ себе самага духовно усовершил  
еси,/ и люди общники сего богатства сотворил еси,/  
еже в любовь Божию скоро возводит,/ даже до  
мученическаго славы.

И к конем привязуеми,/ и мразом ночным  
истязаемы,/ и сечении мечными люте ураняеми,/  
храми явистеся Духа Святаго,/ страсотерпцы  
Христови,/ младости своея не пощадившии./ Темже,  
яко мужи совершеннии,/ к Богу возшедше,/ Того  
молите, даровати людем земли Русския/ мир и велию  
милость.

Ины стихиры, глас 1.

Подобен: Всехвальнии мученицы:

Любовию Христовою связуеми,/ Павле и Григорие  
доблии,/ ко спасению многия люди настависте,/  
образ братолюбия святых показующе,/ еже жити  
братии вкупе, вкупе же и умерети./ И ныне молитесь  
ко Господу,/ да ничтоже разлучит ны от любве  
Божия.

Всяк град земли Пермския празднует,/ известие  
приемь об обретении святых мощей ваших,/  
заступницы наши и молитвенницы,/  
священномученицы Павле и Григорие,/ не под  
спудом, но на свещнице днесь возсиясте,/ Христа  
проповедающе,/ Распятием и Воскресением мир  
спасшаго/ и даровавшаго нам велию милость.

Слава, глас 3:

Коль добро или коль красно,/ во еже жити братии  
вкупе,/ сице мысляху священномученицы Твои,  
Господи,/ ихже бо служение у Престола Божия/  
братию по духу сотвори,/ любовь же ко Христу  
страдати даже до крове укрепи./ Тех молитвами,  
Боже, утверди и нас в братолюбии.

И ныне, Богородичен: Како не дивимся:

Вход. Прокимен дне. И чтения 3 мученическая.

На литии стихиры, глас 1:

Первострадалец                      Христов,                      Стефан  
боговенчаный,/ виде небеса отверста/ и Сына  
Божия одесную Отца стояща,/ вы же, страдальцы  
честнии,/ Павле иерею и диаконе Григорие,/  
небесными венцы украшеннии,/ с сонмом мученик  
одесную Господа предстоите,/ молитесь убо и нам  
шуия части избавитися.

Слава, глас 4:

Павле, доброе Кунгура воспитание,/ и Григорие,  
сыне Вятския земли,/ в пределах Пермских Христу  
добре послужившии,/ от оружных устрелени бысте/ и  
яко ангели просветистесь./ Славу же Распеншагося  
нас ради зряще/ и, яко победители, велие  
дерзновение имуще,/ с мученики новыми молите  
Господа/ спастися душам нашим».

И ныне, Богородичен: Призри на моления:

На стиховне стихирьы, глас 6.

Подобен: Тридневен:

Усердия Андроникова в вере наследницы,/ Павле  
и Григорие славнии,/ пострадасте до крове, подвигу  
архипастыря последствующе./ Темже Христа Бога  
молите,/ сердце верное даровати/ всем почитающим  
страдания ваша.

Стих: Священницы Твои облекутся в правду/ и  
преподобнии Твои возрадуются.

Не дасте братоубийству благословения,/ сего ради  
со братией предел Мокинских/ убиени бысте без  
милости,/ милость проповедавшии/ и убийцы своя  
благословившии,/ да познают, омраченнии, свет  
покаяния.

Стих: Честна пред Господем/ смерть преподобных  
Его.

Красуйся и радуйся, Пермская земле,/ память  
новомучеников празднующи,/ тии бо предстоят  
Христу во славе,/ о людех твоих молящися,/ подвиги  
их воспевающих/ и к святым мощем их с любовью  
припадающих.

Слава, глас 5:

Правнуцы бывше изгнанных из рая/ за  
безсловесное стремление,/ ови Каиново  
братоубийство умножиша,/ ови лихоиманию Иудину  
подражаша./ Вы же, мученицы доблии,/ словесы  
Евангельскими просвещеннии/ и молитвою  
церковною освященнии,/ ратование неправое и  
лютное отринуте,/ брани междоусобней не  
приобщитесь,/ сего ради во едином часе/  
мученичеством восхитисте Царствие Небесное.

И ныне, Богородичен: Храм и Дверь еси:

Тропарь, глас 5:

Честное страдание ваше/ за веру святую  
Православную/ к веселию духовному вся люди  
созывает,/ священномученицы, Павле и Григорие,/  
вы бо, землю Пермскую кровью своими освятивше,/  
любви совершенней научаете,/ душу полагати за  
Христа, Бога нашего,/ Светом Воскресения мир  
обновившаго.

## На утрени

По 1-м стихословии седален, глас 5:

Мраз претерпевше и биение, и коньми влачение,  
и ребр прободение, святии мученицы Павел и  
Григорий радовахуся, от оружных бо устрелени  
бывше, душою во Обители Небесныя вознесошася.  
Тех молитвами, Христе Боже, спаси души наша.

Слава, и ныне, Богородичен:

Споручнице грешных и Утешительнице  
скорбящих, Пречистая Мати Божия Обрадованная,  
Пермскую землю иконами Твоими украсившая и  
святых множество в ней воспитавшая, Твоими ко  
Христу молитвами спаси души наша.

По 2-м стихословии седален, глас 2:

Сосуди честнии, благодати Божия исполннии,  
священномученицы Павле и Григорие! Вы, молитвою  
усердною души ко страданию уготовавше, житие  
временное сохранить не искасте, но потщастесь  
Небеснаго Царствия достигнути, темже и жители его  
святые други себе стяжасте.

Слава, и ныне, Богородичен:

Благоутробия сущи источник, милости сподоби нас, Богородице, призри на люди согрешившия, яви яко присно силу Твою, на Тя бо уповающе, радуйся, вопием Ти, якоже иногда Гавриил, безплотных архистратиг.

Величание:

Величаем вас,/ священномученицы Павле и Григорие,/ и чтим честная страдания ваша,/ яже за Христа/ претерпели есте.

Псалом избранный: Бог нам Прибежище и Сила:

По полиелеи седален, глас 8:

Повеленное во Евангелии приемше в разуме, в церкви Божией единомышлением ходите, святии, глаголом жизни вечныя люди Божии учаще и красоту веры Православныя им показующе, юже да сохранит Господь непоколеблему от всех навет вражиих в земли Русстей, непрестанно взывающей: Пресвятая Троице, Боже наш, слава Тебе.

Слава и ныне, Богородичен:

Повеленное тайно приемь в разуме, в крове Иосифове тщанием предста безплотный, глаголя

Неискусобращней: Приклонивый схождением Небеса, вмещается неизменно весь в Тя. Егоже и видя в ложеснах Твоих, приемша рабий зрак, ужасаюся звати Тебе: радуйся, Невесто Невеизвестная.

Степенна, 1-й антифон 4-го гласа. Прокимен, глас 4: Проидохом сквозе огнь и воду, / и извел еси ны в покой. Стих: Разжегъ ны еси, якоже разжизается сребро. Всякое дыхание: Евангелие от Матфея, зачало 36.

По 50-м псалме стихира, глас 6:

Священномученицы славнии Павле и Григорие, / подвига мученичества сподобльшися, / вся грады и веси земли Пермския воздвизаете / почитати мощи ваша, нам дивно явленныя, / зане христианы добрыми, память вашу хранящими, / многа лета от поругания соблюдаеми быша, / ныне же в храме лучи благодати нам простирают / и вся верныя научают, / како подобает жити и за Христа страдати.

Канон, глас 8.

Песнь 1

Ирмос: *Воду прошед, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.*

Мужеством и крепостию души ваша украсивше и верность Христу в житии сохранивше, вечнаго покоя достигли есте, священномученицы Павле и Григорие.

Павла почтим, страдальца добропобеднаго, священную ризу кровьюми белу соделавшаго, есть бо Пермския земли красота и Мокинския веси слава.

Песненно возвеличим диакона Григория, иже смерть, яко ходатаицу к лучшей жизни, приим, днесь непрестанно возсылает хвалу Избавителю и Богу нашему.

Страданием святых Севастийских мучеников подобницы явистесь, страсотерпцы славнии, мразом бо искусившесь, воины добропобеднии Царя Христа показастесь.

Богородичен: Оружие пройде Твою Пресвятую душу, егда распинаема видеда еси волею Сына и Бога

Твоего, Егоже, Благословенная, молящи не престай,  
прощение прегрешений нам даровати.

### Песнь 3

*Ирмос: Небеснаго круга Верхотворче, Господи,/ и  
Церкве Зиждителю,/ Ты мене утверди в любви  
Твоей,/ желаний Краю, верных Утверждение,/ Едине  
Человеколюбче.*

Мучению лютому без милости предани бысте,  
святии страстотерпцы, обаче плоды любви Христовы  
принесосте нас ради пострадавшему Господу  
Человеколюбцу.

Дом Божий зело возлюбил еси, священномучениче  
Павле, идеже молитву благоговейне совершал еси,  
темже и нам помози в храме усердно Господеви  
молитву возносити.

Церковными гласы, еще отрок сый, Бога  
прославляя еси, святые Григорие, темже и призва тя  
Господь, яко вернаго слугу Своего, в диаконстем чине  
Тому усердно послужити.

Всем верным паствы церкви Никольския  
наставницы мудрии явистесь, священномученицы,

озаряюще души, помраченныя грехом, и к свету богоразумия наставляюще.

Богородичен: Пречистая Дево, Русь зело возлюбившая, и землю нашу чудным светом честных икон Твоих озарившая, страдальцев Пермских сонм собравши, в вере Православней нас утверди до скончания века.

Седален, глас 3:

Проповедницы Православныя веры явльшеся и ревности о храме Божии исполньшеся, служение усердно совершили есте и страдание достойно восприяли есте, святии Павле и Григорие. И ныне молитесь ко Господу, даровати нам мир и велию милость.

Слава, и ныне, Богородичен:

Божественная скиния была еси Слова, едина Пречистая Мати Дево. Утешительница в скорбех сущи, гонимым за Христа всегда помогаеши и водами Божественных молитв Твоих духовную жажду утоляеши, подаючи всем велию милость.

## Песнь 4

Ирмос: *Услышах, Господи,/ смотря Твоего таинства,/ разумех дела Твоя/ и прославих Твое Божество.*

Прослави вас Господь, преподобномученицы добропобеднии, воины бо есте духовнии и свет благодати чистый, священномученика Андроника Пермскаго наследницы.

Врач недугов душевных и мудрый наставник отроком был еси, отче Павле, темже тя славит Пермская земля.

Познав любовь Христову и духом пламенея, в храм Божий притекл еси, священномучениче Григорие диаконе, да послужиши тамо усердно.

Благочестно поживше и страдания путь терпеливно восприимше, священномученицы славнии, сугубую мзду на Небесех восприяли есте.

Богородичен: Всегда припадаем, Марие Дево, к Твоей милости, Ты бо верным щит еси и новых мучеников крепость.

## Песнь 5

Ирмос: *Просвети нас повелении Твоими, Господи,/ и мышцею Твоею высокою/ Твой мир подаждь нам,/ Человеколюбче.*

Благочестия рачителие явились есте, Павле и Григорие премудрии, зане избрасте часть благую.

От юности святость града Иерусалима возлюбив, Павле священне, Голгофу место слезами омыл еси, идеже и тайну Креста Господня познал еси.

Григория, диакона славнаго, днесь, вернии, почтим, иже смиренный сослужитель благоговейному иерею Павлу явися и вкупе с ним за Христа пострада.

Ничтоже возможе разлучити вас, священномученицы, от любве Христовы: ни скорбь, ни гонение, ни смерть, вся бо сия мужественне претерпели есте.

Богородичен: При Кресте Сына Твоего всыновися мир Тебе, о Дево Пресвятая, пречестных мучеников Крепосте и Утешение.

## Песнь 6

Ирмос: *Молитву пролию ко Господу/ и Тому  
возвещу печали моя,/ яко зол душа моя исполнися/ и  
живот мой аду приближися,/ и молюся, яко Иона,/  
от тли, Боже, возведи мя.*

Новомученики Пермския днесь прославим, тии бо  
смерти не убояшася и кровьюми своими землю нашу  
освятиша. Тех молитвами, Христе Боже, спаси души  
наша.

Христа всем сердцем возлюбив, смерть за Него  
доблестно претерпел еси и наветы безбожных  
посрамил еси, отче Павле. Темже молим тя: помози и  
нам в любви тебе подражати и Господеви  
благоугождати.

Молитвами боголюбиваго Григория благодать нам  
подаждь, Христе Боже наш, твердую веру, пламенную  
любовь и Давидову кротость стяжати и заповеди  
Евангельския усердно исполняти.

Коль многое терпение священномучеников Павла  
и Григория! В лютый мраз коньми по земли влачими,  
мучими зле и мечем побиени бывше, обаче безбожное

неистовство смирением победиша и за Христа пострадаша.

Богородичен: Егда ученицы вси, кроме Иоанна юна, от Креста бежаша и, страхом одержими, Христа оставиша, Ты, Дево Пречистая, с Ним пребыла еси. Темже молим Тя: в верности Богови пребывати нам помози.

Кондак, глас 3:

Пастырю добрый Павле / и святолепного служения рачителю Григорие, / паству вашу словом просветивши, / святыни Церкви Христовы зело возлюбивши / и веры ради смерть мученическую приемши, / ныне землю Пермскую благодатию просвещаете / и святыня ея бываете, / мощми своими бессмертие проповедающе / и исцеления точаще всем, с верою к вам притекающим.

Икос:

Восхвалим, людие, двоицу святых страстотерпцев, / духом мужественного иерея Павла / и благоговейнейшаго диакона Григория, / иже, союзом братския любве связуеми, / за Христа

пострадати сподобишася,/ в наша же дни святых  
мощи своя во утешение и укрепление всем явиша,/  
бессмертие проповедающе и чудеса источающе./  
Темже к ним с любовью возопиим:/ радуйтесь,  
священномученицы Павле и Григорие, земли  
Пермския похвало и украшение.

### Песнь 7

*Ирмос: От Иудеи дошедше, отроцы/ в Вавилоне  
иногда/ верую Троицкою пламень пещный попраша,  
поюще:/ отцев Боже, благословен еси.*

Кто не ужаснется огненного искушения, на  
Отечество наше пришедшего, верных людей убиение,  
святых храмов разрушение, детей сиротство и веры  
Православныя попрание! Но, Господи, Иисусе Христе  
Боже, помилуй землю Русскую и спаси души наша.

Мучителей лукавое безбожие не возможе  
поколебати твердости души твоея, священномучениче  
Павле, темже, яко имеяй дерзновение ко Господу,  
моли, да люди греховнаго плена избегнут и достойныя  
плоды покаяния принесут.

Святе Григорие, образ верности Христу и терпеливаго страдания показавый, молися о нас, чтущих твой крестный подвиг, да верная чада Церкви Русския пребудем даже до смерти.

Слагающе в сердце своем глагол Христов, еже не бояться убивающих тело, души же не могущих убить, мужественне на подвиг страдания потекли есте, священномученицы Павле и Григорие.

Богородичен: Сына Воскресшаго зрети чаючи, яко мироносицы жены, Мати Дево, ко Гробу притекла еси зело заутра, учащи нас утреневати к Богу.

### Песнь 8

*Ирмос: Царя Небеснаго,/ Егоже поют вси Ангельстии,/ хвалите и превозносите во вся веки.*

С пределы Пермскими ликують людие веси Мокинския, радуящися обретению в ней святых мощей священномучеников Павла и Григория, и молятся им, яко своим помощником и заступником.

Тебе молящися, священномучениче Павле, согласно взываем: да пробавит Господь милость Свою на нас и примем любовь Христову в душах наших.

Святе Григорие, диаконе досточудне, молися Господу за люди веси Мокинския и всея Пермския земли теплый предстатель буди.

Отца и Сына и Духа Святаго, Троицу Единосущную и Нераздельную, в житии вашем прославили есте, священномученицы добропобеднии, темже и Бог вас прослави и Царствия Небеснаго наследники сотвори.

Богородичен: Днесь людие Пермстии обстоят раку святых новомучеников иерея Павла и диакона Григория, взывающе: о, теплии наши предстателие, молити Христа Бога и Пречистую Его Матерь, спастися душам нашим.

### Песнь 9

Ирмос: *Воистинну Богородицу/ Тя исповедуем,/ спасеннии Тобою, Дево Чистая,/ с Безплотными лики Тя величающе.*

Земля издаде безценное сокровище, мощи священныя Григория и Павла, воинов Христовых добропобедных, от всякаго вреда пределы Пермския защищающих.

О, Павле, честный иерею, священства красото и верных предстателю! Помози нам молитвами твоими мир Христов стяжати и подвигом добрым неленостно подвизатися.

О, славне Григорие, добрый воине Христов и доблий страдальче! Помози нам сердце чистое соделати и спасение душ уллучити.

О, светоноснии мученицы, Пермских предел похвало и украшение! Испросите у Господа Бога и Пречистыя Его Матере оставления всех наших грехов, да избавимся вечнаго осуждения и причастницы Небеснаго Царствия явимся.

Богородичен: Сохрани от бед рабы Твоя, Пречистая Дево, Тя бо теплую Предстательницу к Сыну Твоему имамамы и Тобою спасение уллучити надеемся.

Светилен:

Светлый венец от Солнца Правды, Христа, стяжавше, страсотерпцы святии, светозарно всех просвещаете и чтущия святую память вашу благодатно озаряете.

Слава, и ныне, Богородичен:

Пречистая Мати Дево! Светом незаходимым нас просвети, да в радости ликующе, прославим свет нам Показавшаго.

На хвалитех стихиры, глас 8.

Подобен: О, преславнаго чудесе:

О, всехвальнии новомученицы,/ Пермския земли похвало,/ в годину брани лютейшия/ от безбожных невинно пострадавшии,/ иерею Павле, смирением украшенный,/ и диаконе Григорие, духом пламеней,/ в молитвах теплых испросите/ раку мощей ваших обстоящим/ мир и велию милость.

Не токмо мучеников раны телесныя,/ но и власи священнии/ изочтени суть у Бога,/ Хранящаго вся кости их,/ и души их в руке Своей Содержащаго,/ и молитву их скоро Приемлющаго./ Темже, святии Павле и Григорие,/ помозите нам Господеви благоугодити/ и труды покаянными сердце очистити.

Яко благоговейнии служителие Христови,/ Павле и Григорие блаженнии,/ вы, Безкровную Жертву приносяще,/ о людех усердно молилися есте,/ да

тихое и безмолвное житие поживут,/ христианския  
кончины живота сподобятся./ Помозите и нам  
богоугодне житие скончати,/ добрый ответ на  
Страшнем Судищи Христу Богу воздати/ и милость в  
День страшнаго воздаяния улучити.

Чадом кротость и послушание,/ мужем и женам  
благочестие,/ иноком ревность о Бозе,/ святителем  
укрепление,/ богохранимей стране нашей  
благоверие,/ и Церкви Русстей во истине стояние/  
испросите у Господа,/ священномученицы Павле и  
Григорие,/ Пермския земли украшение.

Слава, глас тойже:

Пророчески Давид во псалмех вопияше:/  
проидохом сквозе огонь и воду,/ и извел еси ны в  
покой./ И вы, священномученицы Павле и Григорие,/  
огнь злобы мучительския безбедно проидосте/ и воду  
слез о супружницах и чадах,/ о роде, и друзех, и о  
пастве своей в душах удержасте,/ да в вино любви  
Божия претворится/ и с чашею страдания вашего  
срастворится./ Темже ныне от всех прославляетея.

И ныне, глас тойже:

Владычице, прими молитвы раб Твоих,/ и  
избави нас/ от всякия нужды и печали.

Славословие великое. И отпуст.

### На Литургии

Блаженна от канона, песни 3-я и 6-я. Прокимен,  
глас 7: Честна пред Господем/ смерть преподобных  
Его. Стих: Что воздам Господеви о всех, яже воздаде  
ми? Апостол к Римляном, зачало 99. Аллилуиа, глас 2:  
Священницы Твои оденутся в правду, и преподобнии  
Твои возрадуются. Стих: Бог нам Прибежище и Сила,  
Помощник в скорбех, обретших ны зело. Евангелие от  
Луки, зачало 106. Причастен: В память вечную будет  
праведник:

**Текст службы утвержден на заседании Священного  
Синода 23-24 сентября 2021 года (журнал № 67).**

